

आकाशवाणीखबरां

1. प्रधानमंत्री नरेंद्र मोदी होर इस्राइल दी द'ऊं दिनें दे राजकीय दौरे पर उत्थे पुज्जी गए न। प्रधानमंत्री होर इस्राइल संसद गी संबोधित करडन। अपने हमरूतबा बेंजामिन नेतन्याहू हुं'दे नै व्यापक गल्लबात करडन।
2. सुप्रीम कोर्ट नै न्यायपालिका पर एन.सी.ई.आर.टी दी 8मीं जमात दी कताब दे संदर्भ च संज्ञान लैता।
3. पच्छिम बंगाल च विधानसभा चुनाएं थमां पैहले केंद्री बलें दे जोआनें गी मुहैया करोआई गेदी गड्डिएं पर GPS Trackers लाने दा फैसला लैता।
4. राष्ट्रपति द्रौपदी मुर्मू होरें बुलधाना जिले दे शेगांव च 4 दिनें दे राष्ट्री आरोग्य मेले दा उद्घाटन कीता।
5. विदेश सचिव होरें यक्को-तक्की दे मद्देनजर सैन्य ए.आई दे जिम्मेदारी नै इसतेमाल लेई भारत दी प्रतिबद्धता पर जोर दिता।
6. ते आई.सी.सी मर्दे दे टी-20 क्रिकेट विश्व कप च कोलम्बो च न्यूजीलैंड दा मुकाबला श्रीलंका कन्नै होआ'रदा ऐ।

<><><><><><>

PM-Israel Visit

प्रधानमंत्री नरेंद्र मोदी होर अज्ज दपैहरी इस्राइल दी द'ऊं दिनें दे दौरे पर तल अबीब पुज्जे। प्रधानमंत्री नरेंद्र मोदी हुंदी एहू इस्राइल दी दुई यात्रा ऐ। प्रधानमंत्री होर अज्ज बड्डलै इस्राइल दे द'ऊं दिनें दे राजकीय दौरे पर रवाना होए हे। एह्दे मगरा उत्थे पुज्जे पर उंदा गर्मजोशी कन्नै भव्य सोआगत कीता गेआ। पत्नी सारा हुंदे नै नेतन्याहू होर ब्हाई अड्डे पर पुज्जे दे हे। प्रधानमंत्री मोदी होरें गी गार्ड ऑफ आनर दिता गेआ। प्रधानमंत्री होर प्रवासी भारती समुदाय कन्नै बी गल्लबात करडन। प्रधानमंत्री मोदी ते उंदे इस्राइली समकक्ष बेंजामिन नेतन्याहू, भारत-इस्राइल रणनीतिक सांझेदारी च कीती गेदी मती तरक्की दी समीक्षा करंगन। एह्दे च सहयोग दे बक्ख-बक्ख खेत्तरें च होर मते मौकें बारै चर्चा कीती जाह्ग जिंदे च विज्ञान ते तकनीक, नवाचार, रक्षा ते सुरक्षा, खेतीबाड़ी, पानी प्रबंधन, बपार ते अर्थबवस्था ते लोके-लोके बश्कार आदान-प्रदान शामिल ऐं लीडरें बश्कार आपसी हित दे कन्नोकत्री इलाकाई ते कुल संसारी मुद्दे पर बी दृष्टिकोण दा आदान प्रदान करने दी मेद ऐ। अपने दौरे शा पैहले प्रधानमंत्री मोदी होरें मेद जताई जे इस्राइल दी उंदी 2 दिनें दी राजकीय यात्रा कन्नै दौनें मुखें बश्कार स्थाई सरबंधें गी होर मजबूती थ्होग। दौरे थमां पैहले अपने रवाना बयान च प्रधानमंत्री होरें आखेआ जे ओहू रणनीतिक सांझेदारी लेई नमैं लक्ष्य तय करडन ते दौनें मुखें लेई लचीले ते समृद्ध होने लेई सांझे दृष्टिकोण गी अगो बधाडन।

<><><><><><>

Israel Prez.

इस्राइल दे राष्ट्रपति इसाक हरजोग होरें आखेआ ऐ जे उंदा मुख ते लोक प्रधानमंत्री नरेंद्र मोदी हुंदे सुआगत करने लेई बेसब्री कन्नै इंतजार करा करदे हे। उंदा एहू बयान प्रधानमंत्री मोदी हुंदे रवाना होने आले बयान दे जोआब आया जित्थे उनें आखेआ ऐ जे ओहू अपने इस्राइली समकक्ष बेंजामिन नेतन्याहू हुंदे नै शमूलियत दा इंतजार करा रदे न। एह्दे थमां पैहले तारें सोशल मीडिया पोस्ट च इस्राइल दे प्रधानमंत्री होरें मोदी हुंदे उत्थे औने गी इक ऐतिहासिक पल करार दिंदे होई भारत-इस्राइल भ्याल दी ताकत गी उजागर कीता हा।

<><><><><><>

SC-NCERT

सुप्रीम कोर्ट नै अज्ज 8मीं जमात दी एन.सी.ई.आर.टी दी पाठ्य पुस्तक च न्यायपालिक च भ्रष्टाचार दे संदर्भ दा मैटर ऑफ ग्रेव संज्ञान लैता ते इस मुद्दे गी गंभीर चैता दा विशे दस्सेआ। मुख न्याधीश सूर्यकांत ते न्याधीश जायमालया बागची ते विपुल एम. पंचोली हुंदी बैच नै इस मामले दा संज्ञान लैता। सीनियर एडवोकेट कपिल सिब्बल होरें अदालत दे सामने दस्सेआ जे 8मीं जमात दे बच्चें गी न्यायपालिका च भ्रष्टाचार बारै सिखाया जा'रदा ऐ ते इसी मता चिंताजनक आखेआ। बैच नै साफ कीता ऐ जे ओहू कुसै गी बी संस्था दी बदनामी नेई करन देगा।

8मीं जमात लेई नमीं सोशल साईस एन.सी.ई.आर.टी पाठय पुस्तक मुजब भ्रष्टाचार, मामलें दा बड्डा बकाया रौहना ते जजें दी कमी न्यायिक प्रणाली गी पेश आले आली चुनौतिएं च शामिल ना।

<><><><><><>

Supreme Court 10th

सुप्रीम कोर्ट नै अज्ज साफ कीता ऐ जे पच्छिम बंगाल च जारी विशेष गहन संशोधन कवायद च 10मीं श्रेणी दा एडमिट कार्ड, पास प्रमाण पत्र दे कन्नोकन्नी पंछान सत्यापन लेई पूरक दस्तावेजें दे तौर पर पेश कीता जाई सकदा ऐ। वरिष्ठ अधिवक्ता डी.एस वरिष्ठ वकील होरें इस गल्लै पर चिंता जताई जे 10मीं श्रेणी दे एडमिट कार्ड गी स्टैंड अलोन पंछान दस्तावेज दे तौर पर स्वीकार कीता जाई सकदा ऐ जां नेई। अदालत नै साफ कीता ऐ जे एहदा इस्तेमाल पास सर्टिफिकेट दे कन्नोकन्नी सिर्फ पूरक दस्तावेजें दे तौर पर गै कीता जाई सकदा ऐ।

<><><><><><>

ECI-GPS

भारत दे चुनांस आयोग नै विधानसभा चुनाएं थमां पैहले पच्छिम बंगाल च तैनात कीते जा'रदे केंद्री सशस्त्र पुलिस बल दे जोआनें गी दिक्ती गेदी गड्डिएं पर जीपीएस ट्रैकर्स लाने दा फैसला कीता ऐ। सी.आर.पी.एफ दे जोआनें दी तैनाती 2 चरणें च होग। अगले म्हीने दी पैहली तरीक थमां 240 कंपनियें दा पैहला चरण, तैनात कीता जाह्ग। पच्छिम बंगाल दे मुख् चुनांस अधिकारी होरें आखेआ ऐ जे जीपीएस ट्रैकर्स सिस्टम कन्नै इको आसेआ नियुक्त केंद्री पर्यवेक्षक सी.ए.पी.एफ दे जोआनें दी गतिविधिएं दी निगरानी करी सकंगन। 10 मार्च थमां 240 कंपनिएं दा दुआ चरण तैनात कीता जाह्ग।

<><><><><><>

Prez. Maharashtra

राष्ट्रपति द्रौपदी मुर्मू होरें अज्ज आखेआ जे आयुर्वेद योग ते होरनें आयुष प्रणाली न सिर्फ बमारियें दे इलाज तगर सीमित ऐ, सगुआं एहू समग्र सेहत प्रबंधन दा इक विज्ञान ऐ। उनें आखेआ जे आयुर्वेद च खान-पान, रोजमर्रा दी दिनचर्या ते बमारिएं दी रोकथाम लेई वैज्ञानिक दिशा-निर्देश उपलब्ध करोआंदे ना। राष्ट्रपति होर आयुष मंत्रालय आसेआ अखिल भारती आयुर्वेदिक कांग्रेस दे सहयोग कन्नै आयोजित बुलढाना जिले दे शेगांव च चार दिनें दे राश्ट्री अरोग्य मेले दा उद्घाटन करने मगरा इक सभा गी संबोधित करारदे हे। राष्ट्रपति होरें भलाई-बेहतरी दे महत्व पर जोर दिंदे होई आखेआ जे एहू इक सार्वभौमिक तौर पर स्वीकार कीता गेदा तथ्य ऐ जे इलाज थमां रोकथाम बेहतर ऐ। उनें आखेआ जे बमारी दी रोकथाम न छडी व्यक्ति लेई लोडमंद ऐ सगुआं देश दी सेहत सरबन्धी प्रणाली उप्पर बी भार घट्ट करदा ऐ।

<><><><><><>

VP -JK Visit

उपराष्ट्रपति सी.पी. राधाकृष्णन होर अज्जै थमां जम्मू-कश्मीर दे 2-रोजा दौरै पर ना। श्रीनगर पुज्जने पर उपराज्यपाल मनोज सिन्हा होरें उंदा सुआगत कीता। अपने पैहले-पैहले दौरै दौरान उप-राष्ट्रपति होर श्रीनगर च युनिवर्सिटी ऑफ कश्मीर दे दीक्षांत समारोह च बतौर मुख् परौहने शामिल होडन। घाटी च एदे लेई सुरक्षा दे व्यापक बंदोबस्त कीते गेदे ना। सुरक्षाबलें आसेआ जांच बढ़ाई दिती गेई ऐ ते महत्वै आहले थाहरें ते औने-जाने आहली थाहरें कश बाददू नाके लाए गेदे ना। जवानें दी गश्त बढ़ाई गेई ऐ। कुसै बी चाली दी माझी हरकत गी रोकने लेई चानचक्क निरिक्षण वगैरा बी कीता जा'रदा ऐ।

<><><><><><>

Train Services on hold

रेल मंत्रालय दे तैहत औने आले रेल बोर्ड नै पैहली मार्च 2026 थमां श्री माता वैष्णो देवी कटरा ते श्रीनगर बश्कार "वंदे भारत" एक्सप्रेस रेल सेवा दे विस्तार गी जम्मू तोड़ी बदाने दे पैहले शा अधिसूचित कार्यक्रमै गी फिलहाल आरजी तौर पर रोक दीता ऐ। आकाशवाणी जम्मू दे संवाददाता मूजब मंगलवारें चिरे संजा जारी कीती गेदी इक इत्रलाहू च जम्मू रेलवे डिविजन दे सीनियर डिविजनल कर्मिश्यल मैनेजर उचित सिंगल होरें दस्सेया जे टाली नेंई जाई सकने आली, किश जरूरी वजहें करी रेलवे नै इस विस्तार पर आरजी तौरा पर रोक लाई ऐ। सिंगल होरें दस्सेया जे इस सरबन्धै च अगगे दी कोई बी जानकारी समें-सिर सांझी करी दिती जाह्ग।

<><><><><><>

भारत नै बदधी वैश्विक यक्कोतक्की दे मद्देनजर रणनीतिक स्थिरता गी बचाने ते नमें सिरेआ हथियारें दी द्रौड़ गी रोकने दी सख्त लोड़ पर जोर दित्ता ऐ। जिनेवा च निरस्त्रीकरण सरबन्धी सम्मेलन दे 2026 दे उच्च स्तरीय कांफ्रेंस गी संबोधित करदे होई विदेश सचिव विक्रम मिसरीं होरें सैन्य ए.आई दे जिम्मेदारी नै इस्तेमाल लेई देस दी प्रतिबद्धता ते रक्षा खेत्तर च भरोसमंद ए.आई दा मुल्यांकन करने लेई राश्ट्री ढांचे पर लोऽ पाई।

<><><><><><>

Poonch Hide out

पुंछ जिले दे गनी जंगली इलाके च सुरक्षाबलें आतंकवादिएं दी छप्पने आहली थाह् दा पता लाइयै उसी नष्ट करी दित्ता। इस दरान सुरक्षाबलें खरी मती गिनतरी च असला-बरूद बी बरामद कीता ऐ। इस बारै थ्होई दी इक टकोह्दी सूह पर कार्रवाई करदे होई सुरक्षाबलें कुदरती गुफा च व्यापक तपशी अभियान रम्भ कीता। इस दरान सुरक्षाबलें गी इक आई.ई.डी जेदा भार 4 अशारिया 5 किलोग्राम ऐ ओह् बरामद होई। एह्दे अलावा इक लौह्की आई.ई.डी, 2 चीनी ग्रेनेड, 9 एम.एम दी इक पस्तौल, ते 7.62 एम.एम दे 22 रौंद बरामद होए। बम्ब नकारा बनाने आह्ले दस्ते नै विस्फोटकें गी नकारा बनाई दित्ता। एह् कार्रवाई व्हाईट नाइट कोर ते पुंछ दे एस.ओ.जी आसेआ सांझे तौर पर चलाई गेई। अभियान अजें जारी ऐ। होर ब्यौरे गी बलगेआ जा'रदा ऐ।

<><><><><><>

N-E Spring Fest. 2026

नागालैंड च 3 दिनें दा नार्थ ईस्ट स्प्रिंग फेस्टिवल 2026 जिसी फेस्टिवल ऑफ नार्थ ईस्ट बी आखेआ जंदा ऐ, कल N.E.Z.C.C परिसर दीमापुर च शुरू होग। इस महोत्सव दा आयोजन पूर्वोत्तर खेत्तर सांस्कृतिक केंद्र दीमापुर आसेआ दक्खन मध्य खेत्तर सांस्कृतिक केंद्र नागापुर कन्नै रलियै भारत सरकार दे संस्कृति मंत्रालय दी अगुवाई च कीता जा'रदा ऐ। एह् ध्यार मध्य दक्खनी महोत्सव 2026 दे कन्नोकन्नी मनाया जाह्ग जेदे कन्नै देश दे पूर्वोत्तर ते दक्खन मध्य खेत्तरें बश्कार इे जीवंत सांस्कृतिक संगम पैदा होग। इस कार्यक्रम दा मकसद पूर्वोत्तर भारत दी समृद्ध लोक ते कवायली सांस्कृतिक विरासत गी बढ्जवा देना ते बचाना ऐ।

<><><><><><>

Cricket

आई.सी.सी पुरुष टी-20 क्रिकेट विश्व कप च अज्ज कोलम्बो दे आर. प्रेमादासा स्टेडियम च न्यूजीलैंड दा श्रीलंका कन्नै ग्रुप 2 सुपर एट मैच च सामना होअ'रदा ऐ। श्रीलंका नै टास जित्तियै पैहले गेंदबाजी दा फैसला कीता। अखीरी समाचार थ्होने तगर न्यूजीलैंड नै 2 ओवरें च विजन विकटें पर 23 रन बनाए लैते दे न। एह्दे थमां पैहले इंगलैंड नै कल रातीं श्रीलंका च खेड्डे गेदे मुकाबले च पाकिस्तान गी दो विकटें कन्नै हराया हा।

<><><><><><>

Ranji Trophy

रणजी ट्रॉफी च जम्मू-कश्मीर दी टीम नै कर्नाटक खलाफ खेडदे होई दुए दिन दा खेड मुक्कने तगर 6 विकटें दे नुकसान पर 527 रन बनाई लैते दे हे। 284 रन दे कल दे स्कोर मगरा अज्ज बी टीम नै बेहतर प्रदर्शन कीता। शुभम सिंह नै 121 रन बनाए, अब्दुल समद नै 61, कन्हैया बाधवान ते कप्तान पारस डोगरा नै अर्ध शतक बनाया। साहिल लोतरा नै 57 रन बनाए ते आबिद मुश्ताक नै 20एं रनें दा योगदान दित्ता ते एह् दवें खडारी खेड खत्म होने तगर क्रीज पर हे।

<><><><><><>